



PREPORUKE EU

Komisija je preporučila nadležnim državnim tijelima da prilikom izrade strategija i propisa održavaju konsultacije sa zainteresovanim stranama, izdvajaju resurse dostatne za ostvarivanje ciljeva strategije, daju prednost kvalitetu u odnosu na brzinu, poboljšaju prikupljanje podataka u statističke svrhe i osiguraju mehanizam praćenja provedbe strategije.

POLJOPRIVREDA I RURALNI RAZVOJ (POGLAVLJE 11)

1. Osigurati daljnje poštovanje svih odredbi **SSP-a o trgovini**.
2. Osigurati daljnje usklađivanje **trgovinske statistike** za poljoprivredne, prerađene poljoprivredne proizvode, ribu i riblje proizvode sa statističkim pravilima EU kako bi se napravila odgovarajuća analiza i spriječila neslaganja između vrijednosti BiH i EU za određene robe.
3. Preduzeti sljedeće neophodne korake kako bi se napredovalo u pripremi **poljoprivrednog popisa**. Neprovođenje popisa ozbiljno ometa poljoprivrednu statistiku i izradu politike poljoprivrednog i ruralnog razvoja. Dodijeliti neophodna sredstva za poljoprivredni popis i osigurati da se zakonski preduslovi, uključujući definisani budžet, pravni okvir, organizaciju i metodologiju ispune do 2. kvartala 2024. godine. Provesti Akcioni plan za pripremu, provedbu i dijeljenje rezultata poljoprivrednog popisa, i provesti poljoprivredni popis u oktobru 2024. godine primjenjujući pravni osnov za cijelu zemlju.
4. Hitno pojačati napore kako bi se poboljšali **upravni kapaciteti** i resursi koji imaju za cilj bolju pripremljenost i postepeno približavanje Zajedničkoj poljoprivrednoj politici (CAP) EU, posebno vezano za uspostavljanje centralne agencije za plaćanja i Integrisanog i administrativnog kontrolnog sistema (IAKS).
5. Ubrzati neophodne ekonomske reforme kako bi se povećala **konkurentnost** ovog sektora.
6. Preduzeti neophodne mjere i korake kako bi se ostvario napredak u uspostavljanju i poboljšanju različitih poljoprivrednih informacionih sistema i osiguranju njihove usklađenosti u cijeloj zemlji.
7. Završiti izradu nove cjelodržavne strategije za poljoprivredu i ruralni razvoj, uz podršku projekta EU4Agri, i usvojiti je (1. kvartal 2024. godine).
8. Hitno ostvariti napredak u **usklađivanju mjera podrške** u cijeloj zemlji i postepeno ih uskladiti s *acquisem* EU.
9. Osigurati da svi podzakonski akti za provedbu Zakona o organizaciji tržišta vina budu usvojeni do 3. kvartala 2024. godine, pripremiti i usvojiti Zakon o **organskoj proizvodnji**, u skladu s *acquisem* EU (4. kvartal 2024. godine).
10. Ostvariti napredak u usklađivanju propisa o politici kvaliteta s *acquisem*, posebno u oblasti **vina i jakih alkoholnih pića**.

SIGURNOST HRANE, VETERINARSKA I FITOSANITARNA POLITIKA

(POGLAVLJE 12)

11. Izgraditi i održavati pouzdan i održiv sistem registracije životinja i vakcinacije gdje god je to svrsishodno kao mjera za poboljšanje kontrole bolesti životinja.
12. Intenzivirati praćenje i nadzor kontrole bolesti životinja. Posebno, provoditi kampanje za vakcinaciju protiv bjesnila i bruceloze i dugoročno intenzivirati mjere za suzbijanje bolesti.
13. Hitno osigurati usklađenost s *acquisem* EU u oblasti sigurnosti hrane, veterinarstva i fitosanitarnoj oblasti, posebno vezano za zakone o hrani, zdravlje životinja i zdravlje bilja, kao i za zvanične kontrole, putem usvajanja propisa na državnom nivou bez odlaganja (1. kvartal 2024. godine).
14. Hitno ojačati i unaprijediti institucionalne i upravne kapacitete, uključujući inspeksijska tijela i laboratorije.
15. Traži se od BiH da ubrza pripreme za uspostavu nacionalnih referentnih laboratorija, kroz daljnje usklađivanje s *acquisem*, posebno putem povećane akreditacije laboratorijskih metoda koje se koriste u higijenskoj, veterinarskoj i fitosanitarnoj kontroli te kontroli hrane i hrane za životinje.

RIBARSTVO (POGLAVLJE 13.)

16. Nastaviti s pripremnim radom i informisati o trenutnom stanju cjelodržavne strategije za ribarstvo i akvakulturu i o Akcionom planu za usklađivanje s *acquisem* u tom sektoru (npr. usklađivanje s Uredbom o organizaciji zajedničkog tržišta, okvirom za prikupljanje podataka), što je od ključne važnosti za usklađivanje sa Zajedničkom politikom u oblasti ribarstva i dalju pomoć.
17. Konsultovati Komisiju o nacrtu cjelodržavne strategije za ribarstvo i akvakulturu do kraja 2024. godine.
18. Ojačati upravne i finansijske kapacitete neophodne za provedbu politike ribarstva i kontrolnih mjera te riješiti ostala neriješena pitanja kao što je uspostavljanje i upravljanje registrom flote.
19. Nastaviti usklađeno prikupljanje podataka i statistike za cijelu zemlju o ulovu i iskrcaju po vrsti ribe te dostaviti najnovije podatke o aktivnostima uključujući radionice i dijeljenje relevantne dokumentacije o operativnim planovima i dogovorenim metodologijama.